

Goibekokale

ELGETA / Barikua / 2005eko martxoaren 4a / 218. zenbakia

KOORDINATZAILEA: Irati Agirreazaldegi • Barrenkalea 33 20570 BERGARA • Tel.: 943 76 92 71 • Faxa: 943 76 29 77 • Posta elektronikoa: goibekokale@goiena.com • Lege gordailua: SS475/95

Kirol instalazioak berritzeko proiektua, Aste Santurako gertu

IRATI AGIRREAZALDEGI

Kirol instalazioak berritzeko premian daudela-eta, Udalean proiektua gertatzen dihardute. Hainbat lehentasun finkatu dituzte, eta proiektua Aste Santurako amaitu nahi dute. Besteak beste, pilotalekuko teilatua konpontzea da asmo nagusietako bat.

Udaleko Kirol Saitetik esan digutenez, proiektua Aste Santu aurretik amaitu nahi dute. Gero, uztailan lanak hasi eta hamar hilabeteren buruan amaitzeko.

Kirol instalazioetan gutxieneko berrikuntzak eginez lege berrietara egokitzea da euren asmoa. "Pilotalekuan egingo ditugu berritze lan garrantzitsuenak, baina gainontzeko instalazioak ahaztu gabe", esan digu Udaleko Kirol teknikariak.

TEILATU BERRIA

Horretarako, hainbat lehentasun finkatu dituzte. Teilatua aldatzea da nagusia. Leihoak eta atearak ere aldatu nahi dituzte. Gainera, Eloorrioko bidera begira dagoen horman ate handi bat egin nahi dute ibilgailuak deskargatzeko.

Argi eta iturgintza instalazioak ere berriak ipiniko dituzte, eta aztertzen dihardute pilo-



Pilotalekuan egingo dituzte berrikuntza nagusiak, baina gainontzeko kirol instalazioak ahaztu gabe.

talekuan berogailua ipini edo ez; kiroldegiko tabernan behintzat jartzea da euren asmoa.

Tabernako komunak ere egokitu egingo dituzte, eta balite-

ke pilotalekuan ere komunak ipintzea; horretarako biltoki bat egokituko dute bertan. Bestalde, pilotalekuko zorua ere berri- tu egingo dute.

Oraindik zehaztu ez badute ere, beste asmoetako bat da pilotalekuaren altuera altxatzea eta atzeko parteko harmaila batzuk kentzea.

LABUR

Jendaurrean ikusgai hautesle zerrenda

Apirilaren 17an egingo dira Eusko Legebiltzarrerako hauteskundeak. Bertan zein elgetarrek botoa eman dezaketek jakiteko hautesle zerrendak ipini dituzte jendaurrean uztailan. Martxoaren 7tik bitartean ikusi ahal izango dira. Datuaren bat oker egonez gero, erreklamazioa egin eta aldatzeko aukera izango da. Komenigarria da lehen aldiz botoa emateko aukera dutenek edo etxebizitza aldatu dutenek arreta bereziarekin begiratzea zerrendak.

Areto futbolean izena emateko azken egunak

Martxoaren 12an hasiko da Areto Futbol Txapelketa. Bertan jokatu nahi dutenek ordea, martxoaren 9a baino lehen eman beharko dute izena. Horretarako Elgetako Kirol Zerbitzura jo behar da: 943 76 8022 telefonora deituz edo kirola@elgeta.net helbide elektronikora mezu bidez bidaliz. Talde bakoitzak 30 euro ordaindu beharko ditu parte hartzeko eta beste 30 euro fidantza gisa.

GARRAIOA

Autobus zerbitzua erabiltzera bultzatzeko kanpaina hasi dute

I.A.

Udaleko Ogasun, Pertsonal eta Zerbitzu batzordeak garraio publikoaren erabilera bultzatzeko kanpaina hasi du. Horretarako, herritarrei esku orriak banatu dizkiete.

Kanpainaren helburua da herritarrek autobus zerbitzuak gehiago erabiltzea. Izan ere, Udalak garraio publiko zerbitzuaren

aldeko apustua egin du "garapen iraunkorra ahalbidetzen duelako, zirkulazio arazoak eragozten dituelako eta aukera merke eta erosoa delako".

Irailean martxan jarri zutenetik urtarrilaren amaierara bitartean 1.724 bidaiarik erabili dute zerbitzua; horietatik gehienek autobus bonua dute. Kopuru hori Udalak nahiko lukeena baino txikiagoa da. Gehienbat ikas-

leek erabiltzen dute autobusa goizean eta eguerdian Bergarara eskolara joan eta bertatik bueltatzeko. Ordu horietan azaroan ibili zen bidaiari gehien, 200etik gora, hain zuzen ere.

KOSTUA

Udalarendako gastu handia da zerbitzua mantentzea. Izan ere, 23.706 euroko kostua du eta Udalak 8.092 euro ordaintzen ditu.



Pesa konpainiak betetzen du Elgetako autobus zerbitzua.

KULTURA

Fernando Saunders Lou Reed-en baxu joleak kontzertua egingo du gaur Espaloian

Gaur, barikua, Fernando Saunders baxu jolearen kontzertua izango da 22:30ean Espaloian.

Saunders oso ezaguna da musika adituendako. Baxu jole bikaina, abeslaria, konposatzailea eta produktorea da bera.

Hainbat artista ezagunekin jardun du diskoak grabatzen eta baita euren biretan ere. Besteak beste, Steve Winwood, Eric Clapton, Jimmy Page, Joan Baez, John McLaughlin, Pat Benatar eta Heart-ekin.

Lou Reed-ekin ere jo izan du baxua eta hark bere azken diskoan Saunderek konposatu eta abestutako kanta bat sartu du. Ruper Ordorikaren *Hurrengo Goizean* diskorako ere egin zuen kolaborazio bat.


POP ETA ROCKA

Txilen hasi zuen bere bakarkako ibilbidea eta ordutik hona hiru disko kaleratu ditu. Sting edo Steve Wonderren tankerako musika egiten du pop eta rocka, hain zuzen ere.

Saundersekin jardungo dute J.T. Lewis bateria joleak (Sting, Tina Turner, Livin Colors, Stanley Jordan, Lou Reed, Herbie Hancock eta Whitney Houston-ekin lan egindakoa); Loo Reed-en taldeko Mike Rathe Gitarra joleak; eta Pete Min gitarra joleak. Heart-ekin.

ERAKUSKETA

Kontzertuaz gain, bada beste kultura jardunik Espaloian. Martxoaren 10ean ipiniko ditu ikusgai Elisabet Eguren bere margolanak. Erakusketa hilaren 20ra arte egongo da.



Fernando Saunderek pop eta rock doinuak joko ditu baxuarekin.

LABUR

Erabilitako 574 olio litro jaso zituen Ecograsek

Hileko azken barikuro jasotzen dute plazan erabilitako olioak. Ecogras enpresa arduratzen da Elgetan ez ezik ibarreko gainontzeko herrietan ere lan hori egiteaz. Batetik, taberna eta jatetxeetan erabilitako olioak batzen dute, eta iazko datuen arabera Elgetan 30 litro jaso zituzten; bestetik, jendeak etxeko sukaldean erabili eta gordetzen duen olioak ere jasotzen dute, guztira 544 litro jaso zituzten iaz. Ecogras enpresakoek jasotako olioak garbitu eta hezetasuna kentzen diote, honela, olio hori biodiesel egiteko erabiltzeko gertatuz. Hurrengo olio bilketa martxoaren 18an egingo dute 16:00etatik 20:00etara udaletxe parean. Aste Santua dela eta aurreratu egin dute eguna.

GAZTEAK

Gaztetxearen urteurrena ospatzeko ekitaldiak martxoan

Bederatzi urte beteko dira aurten gaztetxea zabaldu zutenetik. Urteurrena ospatzeko hainbat ekitaldi antolatu dituzte martxorako. Besteak beste, kontzertuak, bazkaria eta umeen eguna izango dira. Ekitaldiok asteburu honetan bertan hasiko dituzte.

Gaur, barikua, kontzertu batekin hasiko dira gaztetxearen bederatzigarren urteurreneko ekitaldiak. 22:00etan izango da kontzertua eta Tremendamente talde kataluniarrekin batera jardungo dute Desprezio, Kalaña eta Desdixie taldeek.

Martxoaren 12an ospatuko dute urteurrena bera. Egun horretarako, besteak beste, triki-poteoa, bazkaria, jolasak eta kon-



Urteurreneko bazkarirako txartelak salgai daude Haizean eta Gaztetxean.

tzertua antolatzen dihardute. Bazkarirako txartelak salgai ipini dituzte Haizean eta gaztetxean 12 euroren truke.

Gazte Asanbladakoek herriko gazteak animatu nahi dituzte bileretan parte hartzera. Batzarrak barikuetan 18:30ean izaten dira.



Eskola Txikien Jairako kantua gertu

Argazkiko laukote hori arduratuko da Eskola Txikien Jaiari soinu-banda ipintzeaz. Ainhoa Agirreazaldegiaren hitzak musikatu dituzte Izaskun Oianguren, Gorka Arizmendiarieta eta Josu Azkarate elgetarrek eta Soralezuko Loiola Maderak. Bestalde, eskolako umeek errepikak kantatuko dituzte. Prestaketa lanetan dihardute bai musikariek eta baita umeek ere. Espaloian grabatuko dute abestia martxoan, Xabi Labaien teknikariarekin, eta behin nahasketak egindakoa Aste Santu inguruan eskoletan zabalduko dute./I.A.

OSMA
PIEZEN AUKERATZEA ETA EGIAZTATZEA

Salbador kalea 19 behea • 20690 ELGETA
Tel.: 943 768 127
Mobila: 677 032 739

JAR EZAZU HEMEN ZURE PUBLIZITATEA

TEL.: 943 76 92 71

Goibekokale